



Ulloq: 23-12-2024  
Suliap nr. 2024-21372

Postboks 1340  
3900 Nuuk Oqarasuaat  
(+299) 34 50 00  
Mail: nap@nanoq.gl  
www.naalakkersuisut.gl

## Pituffik Space Basemi sulinermi atukkat pillugit § 37 nr.216 naapertorlugu apeqqummut akissut

Asasara Kuno Fencker

Inatsisartut suleriaasianni § 37 naapertorlugu Septemberip arfineq-pingajuanni ukioq 2024-mi Sermitsiami allaaserineqartut kingorna Pituffik Space Basemi sulinermi atukkat pillugit apeqquteqarputit. Apeqqutigineqartut uannut akineqartussanngorlugit ingerlatinneqarsimapput.

1. Sermitsiami ulloq septembarip arfineq-pingajuanni 2024-mi allaaserineqartumut tunngatillugu, Pituffik Space Basemi sulisut atugaanut iliuuseqarniarnissamut Naalakkersuisut qanoq pilersaaruteqarpat, aamma USA-mut suleqateqarneq sakkutooqarfimmilu kalaallit soqutigisaasa qulakkeerneqarnissaat eqqarsaatigalugit?

### Apeqqut siullermut akissuteqaat :

Pituffik Space Basemi sulinermi atukkat Sermitsiami septemberip arfineq-pingajuanni ukioq 2024-mi allaaserineqartut Naalakkersuisunit arajutsisimaneqanngillat. Nunatsinni innuttaasut tamarmik toqqisisimanartumik isumannaatsumillu suliffimminti atugassaqartinneqarnissaat Naalakkersuisut pingartilluinnarpaat. Malittarisassat tamakku Nunatsinni suliffimmi avatangiisit pillugit inatsimmi suliffimmi avatangiisit pillugit nalinginnaasumik aalajangersarneqarsimapput. Inatsit pineqartoq Nunatsinni Sullivinnik Nakkutilliisoqarfiup pisortatut sulinermini tunngavigalugulu aallaavigisarpaa.

Pituffik Space Basemi sulisartut sulinermi atugaasa allaaserineqartut suleqatissat suleqatigalugit Naalakkersuisunit tamakkiisumik misissorneqassapput. Suliap ingerlateqqinnissaata isummerfigineqarnissaat eqqarsaatigalugu suliffeqarnermut oqartussaasunut Naalakkersuisut attaveqalersaapput.

2. Pituffik Space Basemut tunngatillugu kiffartuussinissamut isumaqatigiissutip, Kalaallit Nunaanni suliffeqarfinnut sulisuinullu aningaasatigut suliffissatigullu pitsaanerpaamik qulakkeerinnttuunissaanut Naalakkersuisut qanoq alloriarniarpat?

### Apeqqutit aappaannut akissuteqaat:

Amerikamiut Nunatsinni sakkutoorfeqarnerisa inuiaqatigiinnit iluaqutaanerunissaat qulakkeerniarlugu Naalakkersuisut ingerlaavartumik sulippuit. Tamakku ilaatigut Ataatsimiititaliap Ataavartup ukiumoortumik ataatsimiinnerini sinaakkusiunneqartut



aallaavigalugit amerikamiut danskillu naalakkersuisui qanimut suleqatiginerisigut pisarput. Sakkutooqarfimmi pisunut paassisutissat pisariaqartut Ataatsimiititaliamut Ataavartumut ingerlaqqinneqartarput. Illorsornissamut atatillugu 2020-mi isumaqatigiissutigineqartuni aalajangersakkat naapertorlugit Pituffik Space Basemi sullissinissamik isumaqatigiissutit malinneqarneri iluaqtigineqarnerisalu qulakkeernissaat anguniarlugit ataatsimiinnerit ingerlanneqartarput. Tamatuma saniatigut sullissinissamik isumaqatigiissutit kalaallit suliffeqarfinit sulisartunillu kalaallinit aningaasarsiornikkut suliffissaqartitsinikkullu iluaqutaanerpaanissaat qulakkeerniarlugu Naalakkersuisut pitsangorsaatissanik ingerlaavartumik suliaqartarput.

**3. Siunissami Pituffik Space Basemut kiffartuussinissamut  
isumaqatigiissusiorstarnissamut erseqqissunik sulisut atugaanut kalaallillu  
pisinnaatitaaffeqarlutik illersugaanissaanut qulakkeerinnissallutik Naalakkersuisut  
qanoq pilersaaruteqarpat?**

**Apeqqutit pingajuannut akissuteqaat**

Apeqqutip siulliup akineqarnerani oqaatigineqartutut Nunatsinni innuttaasut tamarmik toqqisisimanartumik isumannaatsumillu suliffimminni atugassaqartinneqarnissaat Naalakkersuisut pingartilluinnarpaat.

Pituffik Space Basemi sulisartut sulinermi atugaat allaaserineqartut suleqatissat suleqatigalugit Naalakkersuisunit tamakkiisumik misissorneqassapput. Tamanna tunngavigalugu suliffeqarnermullu tunngatillugu oqartussaasunut saaffiginninnermikkut suliap ingerlaqqinnissaa piffissamilu aggersumi iliuuseqartoqarnissaa Naalakkersuisut isummerfigissavaat.

Inussiarnersumik inuulluaqqusillunga

**Vivian Motzfeldt**

Naalagaaffinngornissamut Nunanullu Allanut Naalakkersuisoq